

Fiscal a exige 6 aña di prison pa homber cu a abusa tres mucha muher di su famia

ORANJESTAD (AAN): Diabierna mainta e homber di inicial T., a scucha Fiscal exige 6 aña di prison p'e.

Fiscal ta hay'e culpable di a abusa di tres mucha muher famia menor di edad durante un periodo largo. Tratamento di e caso aki a dura basta. DIARIO den e articulo aki ta publica e tratamento di e caso y exigencia di Fiscal. Den un otro articulo ta publica e defensa di abogado.

HUES DI CURACAO:

Ta asina cu un Hues di Curacao a bin Aruba special pa trata e caso aki. Esaki debi na e hecho cu T. ta famia di un miembro di Corte di Husticia. Ora tin situacionnan asina, ta laga un Hues di Curacao bin atende e caso pa muestra e imparcialidad di Corte di Husticia.

Por a ripara cu e Hues a keda sorprendi con bon e medidanan di prevencion pa cu Corona Virus ta den sala di Corte di Husticia.

ABUSO DI MUCHANAN:

Hues a puntra T. di e acusacionnan y el a bisa cu e ta inocente. Hues a bisa cu tin algun persona ta bisa cu si T. a abusa. Hues a muestra cu e dos muchanan a conta e mesun cos, esta cu durante un periodo largo den camber di T., unda nan tabata haci huiswerk, nan tabata worde molestia. T. a bisa cu nan tabata usa su camber pa haci huiswerk y e tabata repasa e lesnan cu nan. Segun T. tin diferente muchanan tabata haci huiswerk.



E acusado T. a desmentí categoricamente cu el a mishi cu e muchanan na nan partinan intimo. Hues a muestra cu un di e muchanan tin 8 y e otro 11 aña. Tin un otro mucha cu a bisa kico e sa y durante interrogacion di Hues Comisario el a bisa cu e tambe a worde abusa door di T.

T. ta keda para riba cu e no a haci nada. El a splica Hues cu e tin bon relacion cu tur e muchanan y nan famianan. Nunca el a pensa cu nan ta acus'e di algo asina. El a remarca, con por ta cu nan ta acus'e di algo asina y nan ta asina sera cun'e.

Hues a bisa cu e muchanan a conta cu nan tabata bay tur dia na e cas di nan oma y tabata haci huiswerk den e camber. E muchanan tabata bisa cu T. tabata mishi cu nan parti intimo y hasta cu T. a kita su paña y a penetra nan. T. a desmentí esaki categoricamente.

Hues a bisa cu e muchanan tabata bisa cu nan a mira con T. tabata haci cu otro. Tambe Hues a muestra cu e muchanan a bisa cu T. tabata sera e porta

di camber na yabi ora e tabata mishi cu nan. Segun T. no ta tur ora e porta tabata sera na yabi. El a bisa cu sa sera e porta na yabi pa otro muchanan mas chikito no bay molestia e muchanan ora nan haci huiswerk.

POTRETNAN PORNO:

E muchanan a bisa cu riba celular di T. a mira potretnan porno. T. a splica cu amigonan ta manda potret p'e y e muchanan ta mishi cu su cel. El a desmentí cu e tabata mira e potretnan hunto cu e muchanan.

Hues a remarca cu e ta haya straño cu T. ta laga e muchanan mira den su cel sabiendo cu e tin potretnan porno. T. a bisa Hues cu e tabata confia cu e muchanan no ta bay wak e potretnan sino ta wak weganen riba cel.

Hues a remarca cu aki no ta cuestion di confia sino cu mester evita di haci esaki. Hues a bisa cu e muchanan a bisa cu mientras cu tabata mira e potretnan porno, T. tabata mishi cu nan.

SOSPECHOSO DESMENTI:

Hues a bisa cu a yega di

acusar T. den pasado cu a abusa di mucha familiar pero e no a worde persigui pasobra a resulta cu e tabata storia di mucha. Segun T., awor despues di 16 aña e ta compronde pakico a gaña riba dje. El a bisa cu su ex amiga a haci esaki door di rabia contra dje.

Hues a muestra cu e mama di e dos muchanan a bisa cu T. a abusa di e confia cu nan tabatin den dje y nan ta hayando tratamento di psicologo. Tin un di e muchanan a keda sinta door di esaki. Mama di dos di e muchanan a demanda 5 mil Florin pasobra e no por a traha.

E mama di e otro mucha a muestra cu e caso aki a afecta nan tambe y nan tambe ta siguiendo tratamento di psicologo. Tambe e mama ta demanda 5 mil Florin.

EXIGENCIA DI FISCAL:

Fiscal a bisa cu e muchanan tabata bay na nan oma, señora di T. pa asina haci huiswerk mientras cu nan mayornan tabata traha. Den camber di T. nan tabata haci huiswerk. T. ta worde acusa

di a abusa di e muchanan pa periodo largo, mas o menos 2 aña. Fiscal a muestra cu T. tabata sera e porta di e camber na yabi. E muchanan no tabata kier a bisa nada door di miedo.

Despues di hopi insistencia, nan a cuminsa papia. Ambos mucha a mira con T. tabata mishi cu nan y a penetra nan.

Fiscal a bisa Hues cu e no ta haya legalmente proba e penetracion sexual y ta pidi Hues pa declara T. liber di esaki. Fiscal a muestra cu tin un di tercer mucha famia, cu tambe tabata victima y a mira con T. tabata mishi cu e otro dos.

Fiscal ta haya cu ademá di e pruebanan aki, tin prueba di sosten. El a remarca cu e hecho cu den pasado a gaña riba T. y tabata denuncia falso, e biaha aki no ta asina. Fiscal ta haya cu T. ta culpable. Pa loke ta e demandanan, e mamanan ta muestra cu e muchanan a keda traumatiza.

Fiscal a pidi Hues pa aproba e demandanan di daño y aplica e medida di pago. Pa cu e castigo, Fiscal a tene cuenta cu e muchanan a keda afecta. E ta haya cu T. a abusa di e confianza cu e muchanan tin den nan opa. El a tuma T. na malo pa esaki y a exige 6 aña di prison.

Hues a sera tratamentu di e caso y a bisa cu e 3 Juli 2020 pa 8:15 ar. lo tin sentencia.

Telefonnan di DIARIO
Tel: 582 2239
Fax: 582 8551